

"Латын графикасына көшу – болашақтың бағдары"

**Мұрат
ЖҮНІСҰЛЫ**

Осындай атаумен Ы.Алтынсарин атындағы Арқалық мемлекеттік педагогикалық институтының "Рухани жаңғыру" жобалық кеңсесінде қазақ жазуын латын графикасына көшіру үрдісіне байланысты қалалық семинар өтті.

Семинарды институт ректоры Сейітбек Қуанышбаев ашып, қатысушылар қалалық тілдерді оқыту орталығының директоры Баян Қалмағанбетованың "Латын әліпбиіне көшу заман талабы", институттың "Мектепке дейінгі және бастауыш білім беру" кафедрасының оқытушысы, магистр Зәуре Ғалымжанованың "Латын әліпбиіне көшудегі қоғамдық көзқарас" атты баяндамаларын тыңдады.

2017 жылдың 26 қазанында Елбасы қазақ тілі қаріптерін кириллицадан латынға көшіру туралы тарихи жарлыққа қол қойды. 2018 жылы 18 қаңтарда "Егемен Қазақстан" газетінде емленің соңғы нұсқасы басылып шықты.

Қалалық тілдерді оқыту орталығы "Қазақ әліпбиін



латын графикасына көшіру" мәселесі бойынша қала әкімі бекіткен желілік жоспар құрып, әкімдік жанынан құрылған ақпараттық – түсіндіру тобы мемлекеттік мекеме, кәсіпорын, білім, медицина, құқық және спорт саласының қызметкерлерімен және студент жастар арасында кездесулер мен дөңгелек үстелдер өткізді.

Жоба аясында 2018 жылы 242 іс-шара өтіп, оған 5894 адам (2017 жылы – 4009 адам) қатысты.

– Бүгінгі таңда облыс әкімінің алдағы наурыз айының 20-на дейін облыс-

тық жалпыхалықтық диктант өткізу жөніндегі тапсырмасын жүзеге асыруға дайындық үстіндеміз, – деді Баян Сәруәрқызы.

Сондай-ақ, институт профессорлары Әбілхан Үмбетов, Айбек Қалиев және Н.Құлжанова атындағы Торғай гуманитарлық колледжі мен Арқалық политехникалық колледжінің тіл мамандары Серік Қапаров, Бағила Балмашевалар ой-пікірлерін ортаға салды.

Арқалық қаласы.

СУРЕТТЕ: семинардан көрініс.

Суретті түсірген автор.